



Republika e Kosovës – Republika Kosova  
Paneli Zgjedhor për Ankesa dhe Parashtrësia  
Izborni Panel za Žalbe i Predstavke

A nr. 75/2014

Paneli Zgjedhor për Ankesa dhe Parashtrësia (PZAP), në panelin e përbërë nga gjyqtarët, Muhamet Rexha kryesues, Nenad Lazić dhe Xhevdet Abazi anëtarë, duke vendosur lidhur me ankesën e Lëvizjes Vetëvendosje (LVV) dega në Prishtinë, paraqitur kundër subjektit politik Partia Demokratike e Kosovës (PDK) dega në Prishtinë, për shkak të fushatës zgjedhore dhe ndikimit tek votuesit përmes shpërblimit që të votojnë për subjektin e tij politik, para kohës së caktuar për fushatë zgjedhore për zgjedhjet e përgjithshme që do të mbahen më 08.06.2014, në seancën e panelit të mbajtur me 26.05.2014, mori këtë:

## V E N D I M

**HIDHET** poshtë si e palejuar ankesa e Lëvizjes Vetëvendosja (LVV), lidhur me pretendimet për fillimin fushatës zgjedhore para datës së caktuar për fushatë, ndërsa sa i përket ekzistimit të pretendimeve ankimore të parashtruara në ankesë përkitazi me përgjegjësinë penale, PZAP-i shpallet **inkompetent**.

### Arsyetim

PZAP-i, me datë 24.05.2014, ka pranuar një ankesë nga LVV dega në Prishtinë, me të cilin theksohet kryeministri i Kosovës Hashim Thaçi, në faqen zyrtare të subjektit të tij politik PDK, me titull “Misioni i Ri” ka publikuar një postim në të cilin thuhet se subjekti i tij politik ka nisur një garë ku aplikuesit mund të fitojnë nga një “Ipad” dhe duke i ftuar qytetarët që të marrin pjesë në promovimin e platformës së tyre politike të Misionit të Ri. Më tutje sipas parashtruesit të ankesës kryeministri i Kosovës fton që të bëhen foto para një panoje të Misionit të Ri të vendosur në qytet ku më pas ajo foto të ngarkohet në seksionin e fotove dhe se gjatë procesit të ngarkimit duhet ta përzgjidhni tagun “Misioni i Ri Selfie”. Sipas parashtruesit të ankesës Kryeministri i Kosovës fton që garuesi apo fotoja e të cilit do të merr numërim më të madh të votave deri me datën 26 Maj në ora 23:59 do të fitoj një “Ipad” ku fituesi do të kontaktohet përmes email-it ose telefonit. Me këtë veprim sipas parashtruesit të ankesës, Hashim Thaçi ka bërë shkeljen e Kodit Penal të Kosovës (KPK), Ligjit për Zgjedhjet e Përgjithshme dhe Ligjit për Financimin e subjekteve politike pasi që veprimet e tilla sipas parashtruesit të ankesës konsiderohen si ndikim tek votuesit nëpërmes shpërblimit financiar dhe keqpërdorimit të varësisë ekonomike të votuesve duke kërkuar nga ata që të votojnë në mënyrë të caktuar, veprime këto të kundërligjshme sipas nenit 213 të Kodit Penal të Kosovës

Parashtruesi i ankesës ka bashkangjitur si dëshmi fotografimin e publikuar së bashku me postimin nga faqja zyrtare e kryeministrit e projektuar nga subjekti politik PDK si dhe vegzat ku është bërë publikimi i tyre në faqen e saj.

PZAP-i, pas shqyrtimit të lejueshmërisë së ankesës gjeti se:

- Ankesa është e palejuar lidhur me pretendimet ankimore të fillimi të fushatës zgjedhore e para datës së caktuar për fushatë zgjedhore,
- Ndërsa sa i përket ekzistimit të pretendimeve ankimore përkitazi me përgjegjësinë penale PZAP-i, shpallet inkompetent.

Sipas vendimit të KQZ-së me nr. protokollit 823/2014 të datës 08.05.2014, Fushata Zgjedhore për zgjedhjet e parakohshme parlamentare fillon nga data 28.05.2014 dhe zgjat deri më datën 06.06.2014, ndërsa dispozitat ligjore të LZP-së konkretisht neni 33 dhe 44 i Ligjit për Zgjedhjet e Përgjithshme (LZP), Rregullës Zgjedhore Nr. 11/2013, Kodi i Mirësjelljes për Subjektet Politike, Mbështetësit e tyre dhe Kandidatët dhe Rregulla Zgjedhore Nr. 13/2013 Fushata e zgjedhjeve dhe njoftimi për ngjarjet politike, përcaktojnë të drejtat dhe detyrimet e subjekteve politike gjatë periudhës së fushatës zgjedhore, andaj PZAP-i duke u bazuar në dispozitat e lartcekura ligjore të cilat përcaktojnë të drejtat dhe detyrimet e subjekteve politike gjatë periudhës së fushatës zgjedhore si duke pasur parasysh se pretendimet ankimore të parashtruara në ankesë nga pala ankuese lidhur me bërjen e fushatës zgjedhore janë zhvilluar para datës zyrtare të caktuar për fushatë PZAP-i, konstaton se pretendimet ankimore lidhur me fillimin i e fushatës para datës së caktuar për fushatë janë të palejuara ngase për këto veprime sipas LZP-së nuk parashihet ndërmarrja e masave ndëshkuese.

Ndërsa lidhur me pretendimet ankimore të parashtruesit të ankesës se ka pasur shkelje të Kodit Penal të Kosovës, duke ndikuar tek votuesit përmes shpërblimeve financiare që të votojnë subjektin e caktuar politik, PZAP-i, në mbështetje të dispozitave ligjore të cilat e përcaktojnë juridiksionin e tij shpallet inkompetent, andaj lidhur me këtë ju udhëzon që ti drejtoheni organeve kompetente për ndjekje penale.

Prandaj duke u bazuar në arsyet e lartpërmendura dhe në dispozitat e nenit 33 dhe nenit 118.1 të LZP-së, u vendos si në dispozitiv të këtij vendimi.

### **Paneli Zgjedhor për Ankesa dhe Parashtrësia**

A nr. 75/2014 më datën 26.05.2014.



PZAP, nuk do t'i pranojë kërkesat për ri-apelim, sepse vendimet e tij do të konsiderohen si përfundimtare. Prandaj, siç parashihet në Nenin 118.4 të LZP-së, ankesa në Gjykatën Supreme të Kosovës mund të paraqitet brenda njëzetekatër (24) orëve nga momenti i marrjes së vendimit nga PZAP-i, në rast se gjoha e përfshirë është më e lartë sesa pesëmijë (5.000) Euro ose në rast se çështja prek një të drejtë themelore.